

一笠菴彙編清忠譜傳奇

上

一、主要經濟情況與特點

一笠菴彙編
清忠譜傳奇

古本戲曲叢刊三集

古本戲曲叢刊編輯委
員會影印大興傅氏藏
清順治刊本原書版高
十八公分寬十三公分

序

先朝有國二百八十餘年
其間被寺人禍者凡三王
振劉瑾專恣於前魏忠賢
擅竊於後馴致流毒天下
而國家遂亡然振瑾之專

執皆岌岌所以危而復安
者以衆賢聚於朝廷其一
二大臣及內外大吏尚未
敢顯為閹寺私人也至魏
忠賢之擅則不然上自宰
輔禁近下暨省會重臣非

閹私人莫參要選時傾險
之士思逞志於正直者亦
願為之爪牙供其走噬甚
至自負阿父養子而不惜
而東林之難作矣故自辛
酉至丁卯七季之中在朝

諸賢無不遭其坑戮而國
家之氣以不振吾郡周忠
介公初吏閩即裁稅闢高
案以強項聞及立朝又無
所迴避文文肅以新進疏
得失語攻東廠與公同邑

相善賢黨深忌之公既免
歸文肅亦削逐猶不釋憾
迺以巡撫起元周公減袍
價一案羅織公斃詔獄文
肅蓄毒藥待命思陵嗣位
羣兇伏辜東林君子幸存

者相繼起用文肅推時重
望訟公寬獨力至今邦邑
人士逮於婦穉咸識公名
稱述遺事如當日者以文
肅為之友而表之於其後
也方公被逮時宣詔於郡

西察院民隨而號泣請救
者萬人見公將就桎梏咸
戟手憤詈因直前擊緹騎
幾為變賴郡守寇公邑令
陳公撫之而後定事聞詔
捕首亂顏佩常等五人毅

然詣官府自列赴死無改
容嗚呼公之節義能使人
感奮至此可謂難矣聞公
在詔獄賢黨虐脅之者萬
端五毒備嘗辭色不少屈
卒以不可屈而私斃之公

長嗣曰茂蘭緹綺之挾公
入都也蘭願徒步從公反
覆喻之因痛哭而止及逆
賢敗刺身血書疏伏闕鳴
父冤請即加誅賢黨某某
等時稱其孝逆案既布以

公事填詞傳奇者凡數家
李子玄玉所作清忠譜最
晚出獨以文肅與公相映
發而事俱按實其言亦雅
馴雖云填詞目之信史可
也余所惜者先朝列聖相

承思陵躬親菲惡焦勞勤
政者十有七年而逆寇射
天神京淪陷追維始禍起
於延西二撫之貪婪皆逆
賢黨也當是時逆布其黨
宇內秦中要地二撫實闡

腹心肆虐縱貪莫之敢指
胎禍全秦者數歲終於賊
焰燎原災彌穹壤一敗而
不可救真可痛也尤扼腕
者思陵圖治相文文肅僅
兩月忌之者即以事中之

去位國政愈不可為甲申
之變留都立君國是未定
顧乃先朋黨後朝廷而東
南之禍亦至噫彼為閹黨
漏網之孽固無足怪誰為
老成喪心耄及更可痛也